



STINAPA TA INFORMA

DRIF DEN LAMAN

Ta ken no konosé Douwe Dooper? Un di e doñonan simpátiko di restorant Mona Lisa. Pa esnan ku sa di nòmbernan hulandes, ta klaro ku e ta bin di Friesland den parti nort di Hulanda. Pa ta mas presis; di e kunuku di su mayornan den Blauwhuis, un pueblo katóliko entre Bolsward i Sneek. “Ke men: masoméno den e parti mas alehá di Friesland anto?” mi ta puntr’é. “Nò nò, nada di masoméno! Mas leu ku esei bo no por bai”, e ta hari ku su hari karakterístiko. “Ku tur su kosnan típiko manera Fjerleppen (un deporte típiko di Friesland: ku un palu largu nan ta bula over di e tantísimo kanal di awa smal ku tin ei). Hungamentu di futbòl den ‘weiland’, buska webu di ‘kieviet’ (un para). Mi infansia tabata tremendo! 18 aña pasá m’a bin Boneiru pa bin traha komo kòki den restorant Beefeater. Einan m’a keda un aña pa despues bai Mona Lisa. Ora ku e doño a fayesé ami ku Hans a tuma e lugá over. Aworakí mi ta kasá ku Morela i nos tin un famia. Hopi kos a kambia den e añanan ei? “En realidat si nò? Pero apeser ku a konstruí hopi, tòg e isla a keda meskos. E temperamentu trankil di nos hendenan no a kambia. Mi ta spera esnan ku ta bin awor tambe por siña esei.” Kon bo ta kompará e naturalesa aki ku esun di Langelille kaminda b’a nase? ”Bon, einan e riu ta influensia tur kos, i aki ta un tiki desierto, pero laman tambe ta parti di naturalesa, i nos tin di kuid’é bon. Nada di reda grandi akinan tende! E ora ei tur kos ta kaba un bes. Lástimamente hubentut no ta prekupa mashá ku naturalesa.” Kuantu tempu lo bo keda akinan? ”Bon, ántes mi tabata pensa pa bai biba na Hulanda bèk ora e yunan tin di bai studia, pero ora ku bo ta drif riba bo lomba den laman, anto bo ta mira e pal’i kokonan, i un pelikan ta pasa riba bo kabes, bo ta pensa: ”Ta unda bida por ta mas dushi ku akinan?” Bo tin hopi di haber ku naturalesa den bo trabou? ”Klaro! Ora ku mi mester di piská òf berdura. Mi ta keda straño ku e piskadónan por suministrá tur e restorantnan ku ta bin aserka. I tambe mi kura di yerba naturalmente. Esei semper tabata mi soño. Esei ta bai bon te ora ku e kachó di bisiña koba saka tur kos atrobe. Hahaha. Pero mi mata di bakoba i lamunchi si ta bai hopi bon semper. ”Kiko lo bo hasi si abo por a disidí pa un día? ”E tasnan di plèstik ku ta bula rònt ta molestia mi hopi, pues lo mi duna hopi edukashon di moda ku hende por dil mas konsiente ku nan ròmel manera bleki di serbes bashí. Lo mi konsentrá riba skolnan. Mi ta kere tin basta trabou pa un dia einan!”

Skirbí pa Marcel Nahr

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESAS



Traha huntu na un desaroyo duradero pa Boneiru